

人物傳第七目錄

汪祥壽妻劉

卞樹年母厲

張毓瑗繼妻吳

卞貞女騫孫

吳鑄母錢

杜節婦馮

郭鍾琦妻王

朱女士靜文

劉開宏繼妻楊

卞喜孫母黃

卞緒昌妾汪

曹振川母丁

張官夔母經

目錄

人物傳

人物傳第七 列女

江都縣新志卷十二

汪祥壽妻劉名永瑛字曼華父聯甲母方永瑛三歲失怙隨母依伯父伯高居伯父歿家益貧四叔父贊勛挈之歸永瑛以鍼黹佐朝夕侍祖母疾數十晝夜目不交睫母病彭亨經年藥罔效永瑛焚香籲天割左臂肉和藥以進病良已人以爲孝所感也年二十一歸汪祥壽事姑克進婦道祥壽曾病於金陵永瑛聞立往病幾殆永瑛侍湯藥復割左臂肉以進卒獲瘳祥壽病凡三閱月永瑛調護左右口不言勞性慈仁視娣姒所生子女如已出鄰人周姓貧鬻其子永瑛爲備價贖歸之戚族

卷十二

人物傳

一

以急難告必勉飲助雖典質衣物弗恤卒年三十有一縣人桂邦傑等臚舉事實爲請褒揚得請如例

張毓瑗繼妻吳氏名蘭英少孤隨母依外家從舅氏焦仲平受學通經史大義及長許字毓瑗爲繼室毓瑗故寒士喪耦後復遭父喪貧若洒雖與氏議婚力不能娶氏外祖母亦有悔意氏聞曰是何言向之許張固知其貧也旣許之矣而復悔可乎乃陰鬻簪珥矯外祖命遺毓瑗俾得蠲吉成禮謂毓瑗曰貧者士之常妾所望於君者勉於學耳勿以境累其心可也毓瑗素通疇人之學自此益自奮名大噪會蘇州設立高等學堂聘爲教

習遂偕氏居於蘇年三十一卒生子二女一

吳鑄母錢氏幼習詩禮明大義年二十三歸於吳夫子良儀徵諸生遭時不偶鬱鬱邁心疾多疑而卞急失常度母將順其意惟恐不至子良旣與世落落所遇多不憚往往歸而遷怒室人舉勞辱之事以責之母母備受陵折不以爲怨惟日調護左右自邁疾至捐館舍前後十餘年母則十餘年如一日也初錢氏世居草堰雄於貲母嫁時裝遣甚厚竝有田一區以子良久病藥餌所費耗其半母素慷慨時緩急人其依母家居草堰也海濱俗悍錢氏族大而豪時以薄物細故致忿爭母以理

卷十二

人物傳

二

諭之不可則解囊以紓其難由是罄所有貧若洒乃攜子女居郡城草堰之人於母之賢至今猶能言之年七十餘卒子三人其二蚤世仲子鑄稱賢孝別有傳

郭鍾琦妻王氏興化人年二十六歸於鍾琦時鍾琦甫籍諸生家貧甚父恩濬隱於卜由興化徙居郡城北門外氏入門環堵蕭然不蔽風日食貧茹苦植蔬刺繡以佐饗飧不足則典質釵珥或至裋衣繼之奉姑章和娣姒鍾琦筆耕於外無內顧憂者氏之力爲多焉鍾琦有妹鍾璇守貞不字兄伯蚤世遺孤女二氏皆善視之晚年奉佛茹素前鍾琦二年卒里黨之人咸稱曰賢云

劉開宏繼妻楊氏名旭和武進人母殉庚申之難隻身逃揚城依徐媪以居年二十三歸劉開宏爲繼室民國二年氏鬻簪珥葺居室創作新小學不足則貨腴產充校費會附近有求新小學將停辦乃合併更名新羣小學兩校生徒濟濟經視學員視察成績昭著先後代請教育部頒給褒章及 大總統題敬教勸學額一方同時公家亦酌貼經費丁卯之役揚城膺兵革航空遂擲炸彈適墮氏居宅中校舍因亦燬焉氏因驚致疾尋愈乃教育當局忽有裁撤新羣津貼之議氏得耗益憂忿旋病歿臨終猶念小學經費不置云

卞喜孫母黃名德昭湖北蘄州人父雲鵠四川建甯道以文章名海內黃幼習詩禮明大義年二十二歸儀徵運同銜國學生卞綏昌卞氏爲儀徵世族居郡城翁寶第閩浙總督綏昌體素羸劬於學結褵未三月而邁疾遽卒黃以青年喪所天處紈綺之中而勵冰霜之操前後逾三十年方綏昌歿時夫兄緒昌季子喜孫生甫百日黃撫以爲子以養以教由襁褓迄成人爲授室並令之游學泰西愛如所生喜孫視黃亦與所生母同也以丙寅年卒年五十有三鄉人上其事政府得褒如例卞緒昌妾汪名芍瑞江都人良家女也性賢淑年十六

緒昌納爲筵室後隨之安徽巡警道任所清宣統二年十月緒昌卒於任汪矢以身殉家人防之嚴未果嫡張夫人甚優禮之然汪死志終未改也嗣卞氏以東南之亂旅寓海上越三年癸丑歲暮移居汪於倉卒閒乘人不備潛購藥和酒服之卒如其志年三十有六時人欽之

曹振川母丁氏浙江吳興人父彥臣山東督糧道年二十二歸江都曹士琦時士琦父丙輝官山東東昌知府故無子以弟潁州知府煒之長子爲嗣與糧道同僚相得因訂婚焉母入門虔事堂上東昌以勞卒於官姑顧

卷十二

人物傳

四

視嗣子如子而士琦體素羸以劬學故患咯血母竭力調護晝奉湯藥夜焚香籲天往往達旦如是者三年而卒不起母誓以身殉顧曰吾年六十旦暮亦將就木今兒死汝遽從之其如吾煢然一身何且以宗祀言長房義不當絕撫兄弟之子爲子則汝無子而有子吾無孫而有孫相依而生少留待我孝哉吾婦能從吾言乎母泣受教復以潁州之長孫振川爲士琦後母愛逾已出唯於督課則不少寬假嘗垂涕而道曰汝父齎志蚤歿汝祖母春秋高吾所以不死者以奉老人與爲門戶計耳今兩世屬望唯汝汝其勉之顧年八十而考終距士

琦之歿二十年母以婦代子色養無違如一日歲丁巳以守節逾三十年得旌如例卒年七十有六振川長而謹飭不失家範有孫三人

張官夔母經幼讀書明大義年二十六歸諸生張元鼎爲繼室元鼎有聲鬻序值洪楊之亂坎壈以老年五十三始生子女官夔官夔生十年而元鼎病瘳息偃在牀母念官夔幼家無恆產乃斥其環瑱及衣物之少侈靡者鬻之以其資築屋而親督工作無令偷惰屋成卽餘地種竹植樹兼治菜畦母雞鳴而起躬炊爨澣濯縫紉一切勞苦之事無寸晷閒而勗其子官夔以力學元鼎病

瘳凡九年而卒又六年而官夔爲諸生始以能授徒養母官夔性誠篤督課甚勤主者爭迎致久之入漸豐而母儉約如故官夔偶市珍羞以進卻弗食雖老猶日汲井灌蔬埽階下落葉代薪暇則辟纪年八十三以庚午六月卒宅邊竹數百竿望之蔚然手植之樹皆扶疏高出屋而官夔鬢髮班白蓋已五十許云官夔字賡廷江都諸生知名於時

卞樹年母厲儀徵人名存慧字紉秋湖北布政使雲官孫女也幼婉婉父復武教以詩書明大義年十九歸同縣卞桐孫時翁肇昌前卒家中落繼姑高主家政母左

右焉嗣桐孫以同知分發浙江母隨往未幾遭疾爲醫者所誤疾革母刲股和藥以進卒不起遺一女無子撫夫兄斌孫季子樹年爲嗣卞厲籍儀徵而皆居郡城卞於先朝兩世開府厲亦簪纓華胄母以盛年喪所天茹苦含辛厲冰霜之操逾三十年事繼姑高曲盡婦道處娣姒以和御下有恩戚族交稱之方桐孫歿時女才四齡所撫子猶在襁褓母視若一而愛或逾其後女適士族所撫子秉母教克成立而母亦老矣母在室爲淑女歸於卞爲賢婦爲慈母綜其生平可風晚近式鄉里蓋不獨苦節之貞云年六十以壬申正月卒

卷十二

人物傳

六

卞貞女騫孫字漢僊儀徵人世居郡城曾祖士雲署理浙江巡撫祖寶書直隸通永河道父肇昌候選訓導母氏夏爲江西新建世族女幼失母庶祖母陳憐而撫育之視如女孫女亦相依爲命陳六十後嬰篤疾女奉侍左右晝夜罔懈嘗刲股和藥以進迨陳歿遂矢志不嫁長齋奉佛以終其身有北宮嬰兒子之風焉鄉人上其事政府得褒如例

杜節婦氏馮沐陽人貧家女也年十七嫁同縣杜某某年倍於婦手鐔爲生時不能具朝夕婦安之無怨言越五年年二十一夫死無子女夫兄某貧無行將改嫁之

婦不可乃潛與人約有期矣婦偵知夜半於牀下穴牆
出縣有大姓程避之其家數年因獲免後隨鄉人就食
來揚州傭於韓韓故大商籍山西以業鹺居揚州方婦
入門時家鼎盛其後漸陵遲主與少主相繼歿又數年
而少主之子歿有遺孤婦保抱攜持自襁褓迄成童飢
飽寒燠切於在身視主之家如其家而忘其身之爲傭
其主視之亦如其家人也凡歷三世前後幾四十年年
六十五終於韓今主婦李孫婦也與孤某德之爲買地
以葬並乞縣人陳懋森爲文以表其墓

女士朱靜文安徽涇縣人性賢淑讀書明大義在室時
事親至孝處兄妹閒極友愛工刺繡花卉翎毛皆栩栩
欲活兼善吟詠有才女稱年十九以遇人不淑仰藥以
歿遺詩一卷中多淒婉之詞讀者哀之

卷十二

人物傳

七